

# Les Virelais

## 1 He dame de vaillance

- A He dame de vaillance  
vostre douce sanlance  
m'a pris sans deffiance  
mais au penre sans lance  
m'a navre durement
- B Car vostre dous riant vair oueil  
et vostre simple chiere
- B et vostre gracieux accueil  
plein de plaisant maniere
- A ont fait par leur puissance  
que m'amour m'esperance  
ma joie ma plaisance  
et toute ma fiance  
maint en vous seulement
- A He dame de vaillance  
.....
- B Autrement ne vous puis mon vueil  
dire ma dame chiere
- B pour ce que quant decouvrir vueil  
m'amour et ma priere
- A Paour me fait deffense  
de dire ma grevance  
et desdaing qui se lance  
en vous vostre presence  
par dangier me deffent
- A He dame de vaillance  
.....
- B Si que tres belle sans orgueil  
que j'aim d'amour entiere
- B Pour vous si grant douleur recueil  
quant einsi m'estre fiere
- A Que je sui en doubance  
d'estre en desesperance  
et si sui en balance  
de morir s'aligence  
n'ay de vous temprement
- A He dame de vaillance  
.....

## 2 Loyaute vueil toujours maintenir

- A Loyaute vueil toujours maintenir  
et de cuer servir  
ma dame debonnaire
- B Mon cuer y vueil et mon desir  
mettre sans retraire
- B Ne ja ne n'en quier departir  
ains vueil toudis faire
- A Son tres dous voloir sans repentir  
et li obeir  
com amis sans meffaire
- A Loyaute vueil toujours maintenir  
.....
- B Mais amour fait mon cuer languir  
et si m'est contraire
- B N'elle ne me daingne garir  
ne je ne puis plaire
- A a la belle que j'aim et desir  
qui a son plaisir  
me puet faire et deffaire
- A Loyaute vueil toujours maintenir  
.....
- B Las si ne scay que devenir  
ne quele part traire
- B quand aler ne puis venir  
au tres dou repaire
- A ou celle maint qui me fait morir  
quand veoir n'oir  
ne puis son dous viaire
- A Loyaute vueil toujours maintenir  
.....

## 3 Aymi dame de valour

A Aymi dame de valour  
 que j'aim et desir  
 de vous me vient la dolour  
 qui me fait languir

B Tres douce creature  
 comment puet vo fine doucour

B Estre vers moy si dure  
 quand mon cuer mon corp et m'amour

A Vous ay donne sans retour  
 et sans repentir  
 or me tenez en langour  
 dont je criem mourir

A Aymi dame de valour  
 .....

B Et tout par en mesure  
 gentil dame pleine d'honneur

B Sui-je a desconfiture  
 car onques ne quis deshonneur

A vers vous ains ay sans sejour  
 fait vo dous plaisir  
 et ne feray sans mauvais tour  
 jusques au morir

A Aymi dame de valour  
 .....

B Mais vostre douce figure  
 vo fine biaute que j'aour

B et vo noble faiture  
 paree de plaisant atour

A en plours tiennent nuit et jour  
 sans joie sentir  
 mon cuer qui vit en tristour  
 dont je ne pui garir

A Aymi dame de valour  
 .....

## 4 Douce dame jolie

A Douce dame jolie  
 pour dieu ne penses mie  
 que nulle ait signorie  
 seur moy fors vous seulement

B Qu'ades sans tricherie  
 chierie  
 vous ay et humblement

B tous les jours de ma vie  
 servie  
 sans vilain pensement

A Helas et je mendie  
 d'esperance et d'aie  
 dont ma joie est fenie  
 se pite ne vous en prent

A Douce dame jolie  
 .....

B Mais vo douce maistrie  
 maistrie  
 - mon cuer si durement

B qu'elle le contralie  
 et lie  
 en amours tellement

A qu'il n'a riens d'envie  
 fors d'estre en vo baillie  
 et ne se li ottrie  
 vos cuers nul alignement

A Douce dame jolie  
 .....

B Et quant ma maladie  
 garie  
 ne sera nullement

B sans vous douce anemie  
 qui lie  
 estes de mon tourment

A A jointes mains deprie  
 vo cuer puisqu'il m'oublie  
 que temprement m'ocie  
 car trop languir longuement

A Douce dame jolie  
 .....

## 5 Comment qu'a moy lointeinne

- A Comment qu'a moy lointeinne  
soiez dame d'onnour  
si m'estes vous procheinne  
par penser nuit et jour
- B Car souvenir me meinne  
si qu'ades sans sejour
- B Vo biaute souverainne  
vo gracieus atour
- A vo maniere certainne  
et vo fresche coulour  
qui n'est pale ne veinne  
voy toudis sans sejour
- A Comment qu'a moy lointeinne  
.....
- B Dame de grace pleine  
mais vo haute valour
- B vo bonte souverainne  
et vo fine doucour
- A En vostre dous demainne  
m'ont si mis que m'amour  
sans pensee vilainne  
meint en vous que j'aour
- A Comment qu'a moy lointeinne  
.....
- B Mes desirs qui se peinne  
d'acroistre mon labour
- B tenra mon cuer en peinne  
et mort en paour
- A se dieu l'eure ne mainne  
qu'a vous qui este flour  
de toute flour mondainne  
face tost mon retour
- A Comment qu'a moy lointeinne  
.....

## 6 Se ma dame m'a guerpi

- A Se ma dame m'a guerpi  
et a un autre que mi  
s'amour ha donnee  
puisqu'il li plaist  
forment m'agree
- B Je ne pensasse nullement  
vraiment  
que muert pu est einsi
- B Son cuer et que departement  
si briefment  
feist de moy et de li
- A Mais elle l'en ha parti  
et pour li mettre en oubli  
li veoir me vee  
puisqu'il li plaist  
forment m'agree
- A Se ma dame m'a guerpi  
.....
- B Je l'ay servie longuement  
loyaument  
n'onques je ne li failli
- B Or me tient doleureusement  
en tourment  
quant mon cuer mort et trahi
- A m'a par samblance d'ami  
et en ottriant merci  
ma mort m'a juree  
puisqu'il li plaist  
forment m'agree
- A Se ma dame m'a guerpi  
.....
- B Ainsi sans nul aligement  
humblement  
d'amours en mourant langui
- B et li desir plus asprement  
qui m'esprent  
m'assaut que onques joy
- A n'eusse car souvent di  
pour ma douce dame aymi  
a vois esplouree  
puisqu'il li plaist  
forment m'agree
- A Se ma dame m'a guerpi  
.....



## 7 Puisque ma douleur agree

- A Puisque ma douleur agree  
a la de bonne heure nee  
qui par droit est appelee  
des dames la flour
- A certes noble destinee  
m'avint l'eure et la journee  
qu'en mon cuer fut engendree  
si douce doulour
- B Si ne pleing pas mon labour  
car ce me semble doucour  
fine et esmeree
- B Quant son gracieus atour  
et sa biaute que j'aour  
par doulce pensee
- A Et sa face coulouree  
de toute biaute paree  
de doucour enluminee  
remir en destour
- A et sa bonte pure affinee  
sa maniere asseuree  
et ce qu'elle est couronnee  
de toute valour
- A Puisque ma douleur agree  
.....
- A Certes noble destinee  
.....
- B Si sent meint plaisant estour  
quant sa biaute que j'aour  
ainsi remiree
- B est en mon cuer par savour  
dont en moy parfaite amour  
est enracinee
- A S'en yiert servie loee  
creinte celee honnouree  
et parfaitement amee  
de moy sans folour
- A en esperant qu'arousee  
soit de la douce rousee  
de merci la desiree  
m'amoureuse ardour

- A Puisque ma douleur agree  
.....
- A certes noble destinee  
.....
- B Mais desirs qui nuit et jour  
m'assaut l'a par sa vigour  
si fort embrase
- B que tainte en est ma coulour  
et ma joie en est menour  
quant tant ha duree
- A mais tant est bien doctrinee  
douce humble simple semee  
plaisant loyal et secree  
ma dame d'onnour
- A qu'en li veoir ier doublee  
ma joie et m'ardeur finee  
et cent fois guerre donnee  
toute ma tristour
- A - Puisque ma douleur agree  
.....
- A certes noble destinee  
.....

8 Dou mal qui m'a longuement

.

A Dou mal qui m'a longuement  
fait languir plaisamment  
merci bonnement  
ma dame jolie

B Pour qui je vueil liement  
souffrir la maladie

B Qui en amoureux tourment  
nuit et jour monteplie

A Pour ce que sans finement  
l'aim et tres finement  
la serf humblement  
sans penser folie

A Dou mal qui m'a longuement  
.....

B Car je sui ligement  
mis en sa signourie

B que jamais aligement  
ne quiert avoir n'aie

A se de li n'est proprement  
qui debonnairement  
m'ocist doucement  
quant merci li prie

A Dou mal qui m'a longuement  
.....

B Et se ma dame plaisant  
qui d'onnour est garnie

B savoit qu'amoureuusement  
me muir a chiere lie

A pour li servir loyaument  
ma peine vraiment  
bien et hautement  
tenroie amenrie

A Dou mal qui m'a longuement  
.....

9 Dame je vueil endurer

A Dame je vueil endurer  
tant com je porroy durer  
sans penser laidure  
m'ardure

B Sage loyal douce plaisant  
tres bonne et belle sans per

B En vo service faisant  
vueil toute ma vie user

A Ne ja ne vous quier rouver  
riens dont vo cuers puist penser  
que je ne tiengne a dure  
m'ardure

A Dame je vueil endurer  
.....

B C'est droit que vo viaire gent  
et vostre dous regarder

B me font amoureuusement  
vivre en joie et demourer

A et tant de bien savourer  
que riens ne puis desirer  
fors qu'ades me dure  
m'ardure

A Dame je vueil endurer  
.....

B Einsi vous vueil tres liement  
doubter servir et celer

B de fin cuer et humblement  
a mon pouvoir honnourer

A et mieux morir pour amer  
vueil qu'on sache mon penser  
ne pour qui j'endure  
m'ardure

A Dame je vueil endurer  
.....

## 10 De bonte de valour

A De bonte de valour  
de biaute de doucour  
ma dame est paree

A de maniere d'atour  
de scens de grace est couronnee

B Dame desiree  
richement aournee  
de coulour

B Bien endoctrinee  
de tous a droit loee  
par savour

A Juenette sans folour  
simplette sans baudour  
de bonne heure nee

A parfaite en toute honnour  
nulle est a vous comparee

A De bonte de valour .....

A de maniere d'atour .....

B Car loyal secree  
de bonne renommee  
sans faus tour

B franche et esmerree  
nette pure affinee  
la millour

A de toutes et la flour  
sans mal sans deshonnour  
estes appelee

A pour ce avez sans retour  
mon cuer m'amour et ma pensee

A De bonte de valour .....

A de maniere d'atour .....

B Et s'il vous agree  
gentil dame honnoree  
que j'aour

B Qu'en moy soit doublee  
sans estre ja finee  
ma langour

A Si vueil je la dolour  
et l'amoureuse ardour  
qu'en moi est entree

A endurer nuit et jour  
ne ja m'en serres meins amee

A De bonte de valour .....

A de maniere d'atour .....

## 11 He dame de valour

A He dame de valour  
que j'aim de loyal amour  
mout m'agree la dolour  
que vo fine doucour  
me fait sentir humblement

B Tres douce dame de bonte  
pleine et de plaisant atour

B De scens d'onnour de biaute  
en qui sont tuit mi retour

A Je vous aim sans folour  
et vous desir par honnour  
et je vous serf en paour  
de mourir en langour  
se pite ne vous en prent

A He dame de valour  
.....

B Mais pour peinne ne pour griete  
pour joie ne pour tristour

B ne lairay qu'en loyaute  
ne vous serve sans sejour

A car mon cuer qui en plour  
est poues mettre en baudour  
et rendre toute vigour  
sans vostre deshonnour  
et donner aligement

A He dame de valour  
.....

B Mais ce vous pri que par pite  
ne facies joie grignour

B et que par volente  
soie vos sers nuit et jour

A par quoy nuls n'ait coulour  
ne pensee que j'aour  
vous com toute la millour  
des mendres et la flour  
des belles a mon talent

A He dame de valour  
.....

## 12 Dame a qui m'offri

A Dame a qui m'offri  
de cuer sans penser laidure  
je n'ay mie deservi

A qu'en hai m'aist si  
vos cuers qu'a desconfiture  
soie pour l'amour de li

B Car de tres loyal amour  
maint jour  
vous ay ame et servi

B N'onques vos cuers n'ont tenrour  
dou plour  
qui m'anienti

A S'en gemi et di  
que ce n'est mie droiture  
que toudis soie en oubli

A Car en mi par mi  
partiroit mon cuer d'ardure  
belle s'il estoit ainsi

A Dame a qui m'offri .....

A qu'en hai m'aist si.....

B Helas toudis sans sejour  
aour  
vos doulz viaire joli

B mais trouver n'i puis doucour  
n'amour  
fors samlance d'anemi

A s'en fremi aymi  
et en dolour qui trop dure  
doleureusement languï

A quand me ri d'ottri  
ne d'esperance seure  
ne m'a encore esjoi

A Dame a qui m'offri .....

A qu'en hai m'aist si.....

B Belle et bonne sans folour  
d'honneur  
vous a dieu si enrichi

B que vous estes de valour  
la flour  
pour ce vous ay encheri

A se vous pri merci  
que de vostre grace pure  
me daingnies clamer ami

A et einsi gari  
m'ares dou mal que j'endure  
tres dont que premiers vous vi

A Dame a qui m'offri .....

A qu'en hai m'aist si

## 13 Quant je sui mis au retour

I Quant je sui mis au retour  
de veoir ma dame  
il n'est peinne ne dolour  
que j'aie par m'ame

Refrain:

dieux c'est droit que je l'aim  
sans blame  
de loyal amour

II Sa biaute sa grant doucour  
d'amoureuse flame  
par souvenir nuit et jour  
m'esprent et enflame

III Et quant sa haute valour  
mon fin cuer entame  
servir la vueil sans folour  
penser ne diffame

## 14 J'aim sans penser laidure

I J'aim sans penser laidure  
et ay lonctemps ame  
celle ou dieux et nature  
ont mis tant de bonte  
que toute creature  
d'onneur a seurmoute

Refrain:

Or m'estdure  
sans mesure  
n'elle n'a pite

de l'ardure  
que j'endure  
pour sa grant biaute

II Sa maniere seure  
douce et simple a mon gre  
et la riche faiture  
de sa plaisant biaute  
par leur douce pointure  
m'ont conquis et outre

III Mais ce n'est pas droicture  
qu'einsi pour loyaute  
soie a desconfiture  
car j'ay sans faussete  
ma dame nette et pure  
servi et honnoure

## 15 Se mesdisans en acort

- A Se mesdisans en acort  
sont pour moy grever a tort  
c'est par leur envie  
car desservi ne l'ay mie  
pour ce de leur genglerie  
bien me reconfort
- B Mais pour eaux mettre en esmay  
plus que ne sueil je seray  
joieuse et jolie
- B Et si aray le cuer gay  
et sagement me tenray  
sans faire folie
- A Einsy feray leur deport  
muer en grant desconfort  
et s'ay ne m'aie bonne volente et lie  
et loyaute dont garnie  
sui jusqu'a la mort
- A Se mesdisans en acort .....
- B Einsy me deporteray  
de tout ce que dire orray  
n'en melancolie
- B ja mon cuer n'en meteray  
pour ce que pure me scay  
de leur tricherie
- A Ne cuers qui est de bon port  
ne doi douter leur raport  
plein de felonie  
N'onques en jour de ma vie  
ma pensee en vilonnie  
ne prist en ressort
- A Se mesdisans en acort .....
- B Pour ce de riens ne m'esmay  
qu'en loyaute fiance ay  
et quoy que nul die
- B tant com mon devoir feray  
leur parler ne doubteray  
que pas ne deffie
- A Et en derier point et mort  
Mais quant leur gengle plus fort  
seur moy se deslie  
tant fin je plus envoisie  
car dieux scet ou je me fie  
comment je me port
- A Se mesdisans en acort .....

## 16 C'est force faire le vueil

- A C'est force faire le vueil  
tuit mi desir  
sont et seront enservi  
vo bel accueil  
chiere dame et d'accomplir  
vostre doulz vueil
- B Car vous me faites sentir  
et conjoir  
par vo dous riant regart
- B un dous mal a soustenir  
que vueil souffrir  
humblement si dieus me gart
- A Mais souvent pleurent mi oueil  
tant je remir  
vo gent corps par souvenir  
dont mon vis mueil  
lors de mon cuer meint souspir  
passent le sueil
- A C'est force faire le vueil .....
- B Ne je ne me puis tenir  
d'einsi gemir  
celeement et a part
- B pour doubte qu'a vo plaisir  
ne puist venir  
le service ou mon cuer art
- A Sans avoir peinne ne dueil  
car se fremir  
teindre trambler et palir  
plus que ne sueil  
me fait et vous obeir  
par ne m'en dueil
- A C'est force faire le vueil .....
- B Ne ja ne m'en quier partir  
ne repentir  
n'estre garis par nul art
- B eins vueil vostre honneur querir  
et vous cherir  
dessus toutes main et tart
- A car vo biaute sans orgueil  
qu'aim et desir  
et dous espoir de merir  
en tel escueil  
m'ont mis que au goust de joir  
mes maus recueil
- A C'est force faire le vueil .....

## 17 Dame votre dous viaire

- A Dame votre dous viaire  
debonnaire  
et vo sage meintieng coy
- A me font vo service faire  
sans meffaire  
de fin cuer en bonne foy
- B Dame et bien faire le doy  
car amoy  
griete douleur ne contraire
- B Onques en vous servant n'oy  
eins congnoy  
que riens ne m'i puist desfaire
- A et qu'ades mieux ne doit plaire  
sans retraire  
de tant com plus m'i employ
- A Car tant estes debonnaire  
qu'exemplaire  
de tous les biens en vous voy
- A Dame votre dous viaire .....
- A me font vo service faire .....
- B Quant je remir vostre arroy  
sans desroy  
ou raisons maint et repaire
- B et vo regart sans effroy  
si m'esjoy  
que tous li cuers m'en esclaire
- A car il le scet si attraire  
par son traire  
qu'en vous maint et je l'ottroy
- A Si ne vueillies pas deffaire  
ceste paire  
dame humblement vous en proi
- A Dame votre dous viaire .....
- A me font vo service faire .....
- B Car lis l'aves en tel ploy  
qu'il en soy  
n'a riens d'ailleurs ne repaire
- B fors en vous et sans amoy  
n'il ottroy  
ne quiert merci ne salaire
- A fors que l'amour qui le maire  
vous appaire  
et que tant sachiez de foy
- A qu'il ne saroit contrefaire  
son affaire  
c'est tout mon chant vous envoy
- A Dame votre dous viaire .....
- A me font vo service faire .....

## 18 Helas et comment aroye

- A Helas et comment aroye  
bien ne joie  
ne dont me venroit baudour
- A quand faire ne puis que j'oye  
ne que voie  
dame vo fine doucour
- B Par m'ame je ne le scay  
ne saray  
lonteins de vous que j'aour
- B Pour ce que qu'ades sans delay  
a l'essay  
sui d'avoir toute doulour
- A Car long de vous tout m'a noye  
et desvoie  
mon cuer et tient en irour
- A Dont pour vostre amour morroie  
se j'estoie  
longuement en telle ardour
- A Helas et comment aroye .....
- A quand faire ne puis que j'oye .....
- B Nompourquant tant com vivray  
vous seray  
loyaus sans penser folour
- B et vostre gentil corps gay  
serviray  
humblement et a s'onnour
- A Si que durer ne porroie  
se n'avoie  
confort de vostre valour
- A contre desir qui guerroye  
et maistoie  
mon cuer et tient en langour
- A Helas et comment aroye .....
- A quand faire ne puis que j'oye .....
- B las il tient en tel esmay  
mon cuer vray  
que je ne scay le piour
- B eslire des maus que tray  
tant en ay  
et tant desir le retour
- A vers vous dame simple et coie  
Or n'est voie  
que puisse trouver ne tour
- A et dou pis qu'amours m'envoie  
c'est que soie  
long de vo faitis atours
- A Helas et comment aroye
- A quand faire ne puis que j'oye

## 19 Dieux biaute douceur nature

- A Dieux biaute douceur nature  
mirent bien toute leur cure  
en vo douce pourtraiture  
dame desiree
- A Car tant est plaisant et pure  
sage en port belle en figure  
qu'eins plus gente creature  
de vous ne fu nee
- B Trop bien estes comparee  
au printemps qui tant agree  
et tant ha puissance
- B qu'en li doucour est trouvee  
verdour fleur fruit et rousee  
et toute plaisance
- A Einsy vo bonte seure  
rent joie et bonne aventure  
c'est l'ente ou tous bien meure  
de tous est amee
- A Tout resjoit tout renature  
cuer sec remet en verdure  
et fait de tristesse obscure  
joyeuse pensee
- A Dieux biaute douceur nature .....
- A Car tant est plaisant et pure ....
- B Aveuc ce vous est donnee  
si tres noble destinee  
qu'il n'est sans doutance
- B grace tant soit affinee  
qui devant vous ait duree  
qu'en vostre presence
- A biaute laidit et s'oscure  
maniere n'a mesure  
doucour samble amere et sure  
ja n'iert tant loee
- A joye y pert envoiseure  
et a regarder droiture  
tout semble oeuvre de rasture  
qui ne soit empruntee
- A Dieux biaute douceur nature  
.....
- A Car tant est plaisant et pure  
.....
- B Bonne et belle et bien paree  
de tres gentil renommee  
mort ou aligence
- B de vo face colouree  
qui tout passe est appelee  
atten car sans lance
- A m'a fait douce blesseure  
vo simple regardeure  
dont j'ay sans plaie pointure  
qui ja niert sanee
- A se vo doucour ne la cure  
qui m'est si doucement dure  
qu'elle art mon cuer n'en l'ardure  
n'a feu ne fume
- A Dieux biaute douceur nature  
.....
- A Car tant est plaisant et pure  
.....



## 20 Se d'amer me repentoie

- A Se d'amer me repentoie  
ne feingnoie  
trop feroie contre mi
- A car tout nom bien si perdroie  
que n'aroie  
jamais bonjour ne de mi
- B Si vueil amer mon amy  
loyaument ou que je soie
- B Et si n'avoir le cuer joli  
gay chantant et plein de joie
- A Ne pour chose que je voie  
ne que j'oie  
ne le quier mettre en oubli
- A car s'autrement le faisoie  
mort l'aroie  
sans cop ferir et trahi
- A Se d'amer me repentoie .....
- A car tout nom bien si perdroie ....
- B Il m'a longuement servi  
si bien que mieux ne verroie
- B n'onques en li riens ne vi  
de quoi reprendre le doie
- A m'onnour vet plus que la soie  
qu'en diroie  
secres et loiaus est si
- A que souhaidier voloie  
je faurroie  
a souhaidier mieux qu'en li
- A Se d'amer me repentoie .....
- A car tout nom bien si perdroie ....
- B Chascuns dit que c'est celi  
qui mieux tient la droite voie
- B pour avoir des biens le tri  
que nature as siens ottroie
- A pourquoy dont ne l'ameroie  
trop aroie  
le cuer divers et failli
- A s'il m'aime je l'amoie  
et creioie  
quant il l'a bien desservi
- A Se d'amer me repentoie .....
- A car tout nom si perdroie ....

## 23 Je vivroie liement

- A Je vivroie liement  
douce creature  
Se vous saviez vraiment  
qu'en vous fust parfaitement  
ma cure
- B Dame de maintieng joli  
plaisant necte et pure
- B Souvent me fait dire aymi  
li maus que j'endure
- A Pour vous servir loyaument  
en soies seure  
que je ne puis nullement  
vivre einsi se longuement  
me dure
- A Je vivroie liement  
.....
- B Car vous m'estes sans mercy  
et sans pite dure
- B et s'aves le cuer de mi  
mis en tel arduie
- A qu'il morra certainement  
de mort trop obscure  
se pour son aligement  
merci n'est prochainement  
meure
- A Je vivroie liement  
.....

## 25 Foy porter honneur garder

- A Foy porter honneur garder  
et pais querir obeir  
douter servir et honnourer  
vous vueil jusques au morir  
dame sans per
- B Car tant vous aim sans mentir  
qu'on pourroit avant tarir  
la haute mer
- B et ses ondes retenir  
que ne peusse alentir  
de vous amer
- A Sans fausser car mi penser  
mi souvenir mi plaisir  
et mi desir sont finer  
en vous que ne puis guerpier  
n'entroublir
- A Foy porter honneur garder  
.....
- B Il n'est joie ne joir  
n'autre bien qu'on puis sentir  
n'imaginer
- B qui ne me semble languir  
quant vo doucour adoucir  
vuet mon amer
- A dont loer et aouer  
et vous cremir tout souffrir  
tout conjoir tout endurer  
vueil plus que je ne desir  
guerre donner
- A Foy porter honneur garder  
.....
- B Vous estes le vray saphir  
qui puet tous mes maus garir  
et terminer
- B Esmeraude a resjoir  
rubis pour cuers esclairecir  
et conforter
- A Vo parler vo regarder  
vo maintenir font fuir  
et enharir et despiter  
tout vice et tout bien cherir  
et desirer
- A Foy porter honneur garder  
.....

## 26 Tres bonne et belle mi oueil

- A Tres bonne et belle mi oueil  
joyeuse pasture  
prennent en vostre figure  
simple et sans orgueil  
et mes cuers en vostre accueil  
vie et douce norriture
- B Quant vo maniere meure  
rassise et seure  
voy d'honneur sui en l'escueil
- B Et quant vo regardeure  
riant par mesure  
vient seur moy tout bien recueil
- A Car je sui si a mon vueil  
qu'en moy joie dure  
qui de plus grant m'asseure  
adont le fruit cueil  
d'espoir se vrais estre vueil  
vers vous dame necte et pure
- A Tres bonne et belle mi oueil .....
- B Si que chose ne m'est dure  
que pour vous endure  
qui n'a dessous le soleil
- B feminine creature  
ou mis ait nature  
si doulz vis ne corps pareil
- A Et pour ce a vous servir vueil  
sans penser laidure  
com cils qui d'autre n'a cure  
n'autre amer ne sueil  
ainsois a ce m'apareil  
humblement senz mes presure
- A Tres bonne et belle mi oueil .....
- B Se desirs par se pointure  
me tient en arduure  
loing de vous dont mon vis mueil
- B soubs celee couverture  
dame c'est droiture  
si que pas ne m'en merveil
- A Mais lors vos graces concueil  
qu'en mon cuer figure  
la repreng en voiseure  
et pas ne m'en dueil  
se mesdisans en ont dueil  
car c'est leur desconfiture
- A Tres bonne et belle mi oueil .....

## 27 En mon cuer ha un descort

- A En mon cuer ha un descort  
qui si fort le point et mort  
que sans mentir  
s'amours par son dous plaisir  
m'i met acort  
aveuc ma dame pour mort  
me doy tenir
- B C'est de mon loyal desir  
qui me vuet faire jehir  
le mal que fort
- B Et comment j'aim et desir  
ma dame sans repentir  
et sans confort
- A Mais paour s'oppose fort  
et dir que desir ha tort  
de ce querir  
qu'elle crient refus oir  
qui pas ne dort  
et dangier qui fait a mort  
l'amant venir
- A En mon cuer ha un descort .....
- B Si ne scay que devenir  
quand de ma dame remir  
le gentil port
- B car paour me fait fremir  
et trambler et tressaillir  
par son enort
- A et desir sans nul deport  
fait mon cuer par son effort  
tandre et palir  
biaute me vient assaillir  
douceur m'endort  
mais amours me fait au fort  
taire et souffrir
- A En mon cuer ha un descort .....
- B Las einsi m'estuet languir  
plaindre plourer et gemir  
en desconfort
- B ne bien n'ay fors souvenir  
dous penser et li servir  
la me confort
- A La seulement me deport  
la sont gete tout mi sort  
et la me tir  
la vueil vivre et morir  
et la m'acort  
la seront tuit mi ressort  
jusqu'au morir
- A En mon cuer ha un descort .....

## 28 Tuit mi penser

- A Tuit mi penser  
sont sans cesser  
en vous amer  
et honnourer  
tres douce creature
- B Nonques mes yeux saouler  
de regarder  
et remirer  
vo gente pourtraiture
- B Ne pas ne mon cuer oster  
d'ades penser  
a vo vis cler  
et a vo bonte pure
- A Ce fait doubler  
et embrasser  
et aviver  
par desirer  
mon amoureuse ardure
- A Tuit mi penser .....
- B Mais tant com porray durer  
la vueil porter  
et endurer  
humblement sans laidure
- B Ne ja ne vous quiert rouver  
guerre donner  
ne demoustrer  
que je la teingne a dure
- A Car trop parler  
puet moult grever  
et refuser  
feroit crever  
mon cuer dans sa pointure
- A Tuit mi penser .....
- B Si que tres belle sans per  
que voy passer  
et surmonter  
toute oeuvre de nature
- B On ne me doit pas blasmer  
se mon penser  
ay sans fousser  
mis et toute ma cure
- A en vous loer  
en vous garder  
en vous celer  
en vous douter  
car c'est ma norriture
- A Tuit mi penser .....

29 Mors sui se je ne vous voy

- A Mors sui se je ne vous voy  
dame d'onneur  
car l'ardour  
qui ma dolour accroist en moy  
m'occira si com je croy  
pour vostre amour
- B Si ne say que faire doy  
car riens de nulle part n'oy  
qui ma tristour
- B esteingne ne mon anoy  
et bien scay qu'onques mais n'oy  
tel ne grignour
- A Car tant sueffre et tant recoy  
paine et paour  
qu'ades plour  
dont tels m'atour  
seuls en requoy  
que je ne mengue ne boy  
riens par savour
- A Mors sui se je ne vous voy .....
- B Helas si ne scay pour quoy  
pitez dort et bonne foy  
car de mon plour
- B desir estanche sa soy  
et souvenir avec soy  
qui sans sejour
- A me monstrent vo bel arroy  
vostre valour  
vo doucour  
vo cointe atour  
vo maintieng quoy  
et font qu'a vous tout m'ottroy  
sans deshonnour
- A Mors sui se je ne vous voy .....
- B Dame pour ce me desvoy  
car quant en vous tous m'employ  
et je n'ay tour
- B pour vous veoir je y congnoy  
ma mort s'en sui en tel ploy  
que sans retour
- A mors sui car moult bien parcoy  
que ma coulour  
ma vigour  
et ma boudour  
pers et si troy  
font qu'a vous mon cuer envoy  
plus n'ay de jour
- A Mors sui se je ne vous voy .....

## 30 Liement me deport

- A Liement me deport  
par samblant mais je port  
sans joie et sans deport  
une si grief pointure
- A que je suis ou droit port  
de mort sans nul deport  
se d'amours n'ay tel port  
qu'il me preingne en sa cure
- B Car quant de vo figure  
la douce pourtraiture  
dedens mon cuer recort
- B espris sui d'une arsure  
ardant crueuse et sure  
pleine de desconfort
- A Car desir son effort  
fait de moy grever fort  
mais j'ay cuer assez fort  
contre sa blessure
- A Si me desconfort  
car d'espoir me confort  
qui me donne confort  
en vostre doucour pure
- A Liement me deport .....
- A que je suis ou droit port .....
- B Si qu'einsi m'asseure  
espoir qui moy dure  
vers desir qui ha tort
- B quant sans nulle mesure  
quiert ma desconfiture  
qu'a moy toudis s'amort
- A N'en riens ne s'en remort  
il ne tent qu'a ma mort  
il me point il me mort  
Trop me nuit sa morsure
- A Il m'aroist tantot mort  
par son merveilleus sort  
se n'estoit le ressort  
d'esperence seure

- A Liement me deport  
.....
- A que je suis ou droit port  
.....
- B Mais pour peine qu'endure  
tant soit a porter dure  
n'orrez vilain rapport
- B que je pense laidure  
barat ne mespresure  
vers vo gentil port
- A Amours m'en raport  
et se pitez endort  
mon desir qui ne dort  
joie ert pour moy meure
- A dieu pri qu'il vous enort  
si qu'en soiez d'acort  
belle qu'a vous m'acort  
seur toute creature
- A Liement me deport  
.....
- A que je suis ou droit port  
.....

## 31 Plus dure que un dyamant

- A Plus dure que un dyamant  
ne que pierre d'aymant  
est vo durte  
dame qui n'avez pite  
de vostre amant  
qu'ocies en desirant  
vostre amitie
- B Dame vo pure biaute  
qui toutes passe a mon gre  
et vo samblant
- B simple et plein d'umilite  
de doucour fine pare  
en souriant
- A Par un accueil attraiant  
m'ont au cuer en resgardant  
si fort navre  
que jamais joie n'auray  
jusques a tant  
que vo grace qu'il a tant  
m'aurez donne
- A Plus dure que un dyamant .....
- B J'ay humblement endure  
l'amoureux mal et porte  
en attendant
- B vostre bonne volonte  
que j'ay en tous cas trouve  
dure et poignant
- A Et quant tous en vo commant  
suis je me merveil comment  
vostre bonte  
m'a sa grace refuse  
quant en plourant  
vous ay et en souspirant  
merci rouve
- A Plus dure que un dyamant .....
- B Helas dame conforte  
ne m'avez en ma griete  
ne tant ne quant
- B eins m'avez desconforte  
si que tout desconfort he  
mais non pour quant
- A j'ameray d'or en avant  
plus fort qu'onques mais et quant  
mort et mine  
m'ara vostre cruaute  
qui m'est trop grant  
lors sera bien apparant  
ma loyaute
- A Plus dure que un dyamant .....

## 32 Dame mon cuer emportes

- A Dame mon cuer emportes  
dont tant sui desconfortes  
que vraiment  
durer ne puist nullement  
se ne l'ames  
et se vous ne le gardez  
songneusement
- B Car il s'est si ligement  
et si amousement  
a vous donne
- B qu'a vostre honnour seulement  
est tout son entendement  
bien le savez
- A Dont se ne le voles  
dame et vous le desboutes  
legierement  
pourres savoir se je ment  
qu'ocis m'ares  
se vous ne me secoures  
procheinement
- A Dame mon cuer emportes .....
- B Je pleure moult tendrement  
et souspir parfondement  
quant vous partez
- B et faire ne puis comment  
vous die a dieu commant  
Desesperes
- A en sui et si forsenes  
quand li mal sui fortunez  
qu'a grief tourment  
m'ocira vo partement  
dire l'ores  
s'excuse ne m'en tenez  
entierement
- A Dame mon cuer emportes .....
- B Dame vo viaire gent  
dous amoureux et plaisant  
est figures
- B en mon cuer si proprement  
qu'ades le voy clerement  
et en doubttes
- A que vrais seray et secres  
puis qu'einsi mon cuer avez  
parfaitement  
pour ce vous pri humblement  
ne m'oubliez  
qu'amee de moy seres  
tres loyaument
- A Dame mon cuer emportes .....

## 33 Se je souspir parfondement

- A Se je souspir parfondement  
et tendrement  
pleure en recoy  
c'est par ma foy  
pour vous quant vo faitis corps gent  
dame ne voy
- B Vostre dous maintieng simple et coy  
vo bel arroy  
cointe et plaisant
- B et vo maniere sans effroy  
pris m'ont cil troy  
si doucement
- A qu'a vous tres amoureusement  
entierement  
doing et ottroy  
le cuer de moy  
qui loing de vous esbatement  
n'esbanoy
- A Se je souspir parfondement .....
- B Si que je port plus grief anoy  
qu'onques mais n'oy  
secretement
- B mais par m'ame je le conjoy  
et le recoy  
tres humblement
- A Que aligier poues mon tourment  
legierement  
d'un seul ottroy  
et plus qu'un roy  
moi faire vivre liement  
ainsi le croy
- A Se je souspir parfondement .....
- B Dame mis m'aves en tel ploy  
bien le percoy  
que vraiment
- B en vous sens temps et vie employ  
et toudis croy  
en ce talent
- A Et se de loing sui aligement  
et povrement  
de merci j'oy  
ne m'en desvoy  
car si grant honnour nullement  
avoir ne doy
- A Se je souspir parfondement .....

## 37 Moult sui de bonne heure nee

- A Moult sui de bonne heure nee  
quant je sui si bien amee  
de mon doulz ami  
qu'il a toute amour guerpi  
et son cuer a toutes vee  
pour l'amour de mi
- B Si que bonne amour graci  
cent mille fois qui  
m'a si tres bien assenee
- B que j'aim la fleur et le tri  
de ce monde cy  
sans part et sans decevree
- A Pour sa bonne renommee  
qu'est cent fois de tous loee  
plus que je ne di  
qui mon cuer ha si ravi  
qu'onques mais en amouree  
fame en fusy
- A Moult sui de bonne heure nee .....
- B Nos cuers en joye norry  
sont si que soussi  
ne riens ne nous desagree
- B N'avons pour ce que asservi  
somes de mercy  
qu'est suffisance appelee
- A un desir une pensee  
un cuer une ame est entee  
en nous et aussi  
de vouloir sommes uni  
onques plus douce assamblee  
par ma foy ne vi
- A Moult sui de bonne heure nee .....
- B Nompourquant je me defri  
seulette et gemit  
souvent a face eplouree
- B quant lontaine sui de li  
qu'ay tant enchiery  
que sans li riens ne m'agree
- A Mais d'espoir sui confortee  
et tres bien asseuree  
que mettre en oubly  
ne porroit par nul sy  
dont ma joie est si doublee  
que tous maus oubly
- A Moult sui de bonne heure nee .....

## 38 De tout sui si confortee

- A De tout sui si confortee  
 que jamais n'iert hostelee  
 tristesse n'esmay  
 en mon cuer aincois aray  
 lie et jolie pensee  
 tant com je vivray
- B Bien faire et avoir cuer gay  
 c'est tout plus n'emporteray  
 quant seray finee
- B dont lie et loyaulz seray  
 et le contraire feray  
 de ma destinee
- A Car lasse desconfortee  
 triste dolente esplouree  
 este lonctemps ay  
 mais je ne me conforteray  
 et celui qui tant m'agree  
 sur tous ameray
- A De tout sui si confortee .....
- B Si que gay me tendray  
 ne ja ne le guerpipay  
 heure ne journee
- B Car en ceste pel murray  
 fors tant que je maudiray  
 longue demouree
- A s'onneur et sa renommee  
 qui tout passe est appelee  
 toudis garderay  
 et tant com durer porray  
 plus que creature nee  
 li obeyray
- A De tout sui si confortee .....
- B Ainsi riens ne souffery  
 n'a chose ne penseray  
 qui me desagree
- B et le temps oublieray  
 tant que revenir verray  
 d'estrange contree
- A li qui trop plus m'a amee  
 servi gardeee honnouree  
 que nulz bien le scay  
 pays et foy li porteray  
 pour ce qu'a li sui donnee  
 de fin cuer et vray
- A De tout sui si confortee .....